

YUBU HAPPENING DEDICA NA JAN POETS

ORANJESTAD (AAN): Mas cu claro, Matutino DIARIO ta sinti su mes orguyoso cu e organizadornan di Yubu Happening di awe Diabierna, a dicidi na dedica e evento na e gran personahe di mundo artistico, deportivo, y informativo... esta Jan Poets.

Su nomber berdadero ta Eddie Peterson, y ta originalmente di pueblo di San Nicolas. Despues di a labora den mundo di Casino, unda e.o. e tabata organiza Weganan di Futbol den Madruga, su amor pa periodismo a nace ora cu el a dicidi di saca foto di e weganan aki y redacta algun informe pa suministra prensa local.

Esey tabata debi cu e tempo ey, bo no tabata haya un periodista deportivo ta lanta madruga pa bay haci cobertura di weganan di futbol.

Aki ta unda DIARIO a descubri su talento pa noticianan deportivo, y aki tambe Eddie Peterson su amor a bira mas grandi pa relata noticia pa pueblo.

Durante Carnaval, Eddie a

ripara cu tin un vacio grandi den loka ta trata exposur di artistanan local durante e dianan di fiesta popular. Pesey despues di Carnaval, el a acerca DIARIO cu e idea pa bin cu algun pagina dedica na nos artistanan. El a introduci asina e columna Den Ambiente, y a adapta su nomber artistico Jan Poets.

E nomber ey e tabatin for di tempo cu e tabata chikito, y mas cu claro el a use y awendia e nomber ey ta skeiro constantemente den nomber di artistanan mundialmente famoso. Asina e.o. tempo cu Jose Feliciano a bin Aruba, e prome cos cu el a puntra ta: "¿Donde está Jan Poets?"


El a hasta crea e famoso "Den Ambiente Awards" y "Premio Padu del Caribe" pa asina duna homenahe na nos artistanan local, sinembargo debi cu tin algun instancia cu no ta cumpli cu nan palabracionnan, e no por a sigui cu e evento aki.

Cu e exito di Den Ambiente den exterior di mas grandi di Aruba, Jan Poets a bira mas y

mas popular. Su famoso 'estilo di hari' tambe a haya atencion, incluyendo varios grabacion di disco.

Awor Jan Poets hasta ta promove nos artista- y deportistanan via di su programa di Radio, como tambe na Television. E tin un habilidad enorme pa adapta su mes rapido na cualkier medio tecnologico nobo cu bin riba mercado. E tin un habilidad enorme tambe pa keda 'pusha' pa haya un noticia, te cu e ta logra. Algun aña pasa el a hasta logra drenta den SuperBowl na New Orleans, sin cu e tin carchi of credencial oficial den su man. Mesun cos na certamennan di belleza internacional, unda nan no ta permiti prensa pa drenta den publico. E si ta logra di haci esey y trece fotonan cu ningun otro fotografo tin.

E aña aki por spera Jan Poets cu su programa di Poets-TV via di ATV unda e ta haci bishita cerca Arubianonan den exterior pa asina pueblo mira con nos Arubianonan ta



labora y progresa rond mundo.

DIARIO ta felicita esnan di

Yubu Happening cu e dedicacion awenochi na Jan Poets. E merece esey!